

স্থানীয় সরকারমন্ত্রীর শঙ্কা
তলিয়ে যেতে পারে ঢাকার নিম্নাঞ্চলও
নিজস্ব প্রতিবেদক ২০ জুন ২০২২, ০০:২৯

দেশের প্রধান প্রধান নদ-নদীতে পানির উচ্চতা বৃদ্ধি পাচ্ছে। সিলেট, সুনামগঞ্জ, মৌলভীবাজারের মতো টাঙ্গাইল, মুন্সীগঞ্জ ও শরীয়তপুর এলাকায় পানি বাড়ছে। এমনকি ঢাকার নিম্নাঞ্চলও পানিতে তলিয়ে যাওয়ার ঝুঁকিতে রয়েছে। এমন আশঙ্কার কথা জানিয়েছেন খোদ স্থানীয় সরকারমন্ত্রী মো: তাজুল ইসলাম। তিনি আশঙ্কা প্রকাশ করে বলেন, অতিরিক্ত মাত্রায় উঁচু অঞ্চল থেকে পানি প্রবাহিত এবং অনেক বেশি বৃষ্টি হলে ঢাকার নিম্নাঞ্চলও প্লাবিত হতে পারে।

১৯৯৮ সালের মতো রাজধানীতে বন্যা হতে পারে কি না, জানতে চাইলে তিনি বলেন, ১৯৯৮ সালে আমরা বন্যা মোকাবেলা করেছি। আগেও বহুবার মোকাবেলা করেছি। ১৯৯৮ সালে বলা হয়েছিল দুই কোটি মানুষ মারা যাবে। কিন্তু একজনও মারা যায়নি। সে সময় মানুষ না খেয়েও মারা যায়নি। যেখানে যা করা দরকার সেটি করা হচ্ছে। তবে যেকোনো খারাপ পরিস্থিতির জন্য প্রস্তুত থাকতে হবে। অপ্রস্তুত থাকা উচিত না। সব পরিস্থিতির জন্য প্রস্তুত আছি।

স্থানীয় সরকারমন্ত্রী বলেন, ২০২০ সালে সবাইকে মোবাইলে থেকে দেখিয়েছি, সিঙ্গাপুরে কিভাবে পুরো প্লাবিত হয়েছে। সেখানে গাড়িগুলো নৌকার মতো ভাসছিল। এ রকম পরিস্থিতি পৃথিবীর বিভিন্ন জায়গায় দেখেছি। নিউইয়র্কে দেখেছি, সাবওয়েতে পানি ঢুকে গেছে। নিউইয়র্কও কিন্তু প্লাবিত হয়েছে। প্রাকৃতিক বিষয়ে তো কেউ-ই প্রস্তুত থাকে না। তবে আমরা আমাদের প্রস্তুতি নিয়ে রাখছি।

জলাবদ্ধতা নিয়ে এক প্রশ্নের জবাবে তিনি বলেন, নিম্নাঞ্চলটা দ্রুত প্লাবিত হয়। আমরা এখনো সব কাজ করে ফেলতে পেরেছি, তা নয়। কিছু খাল দখলমুক্ত করা হয়েছে। উদ্ধার কাজ চলমান আছে। সিটি করপোরেশনে নতুন অন্তর্ভুক্ত ওয়ার্ডগুলো বেশির ভাগই নিম্নাঞ্চলে। সেখানে অবকাঠামোগত সমস্যা আছে, যা নিরসনে চার হাজার কোটি টাকারও বেশি বরাদ্দ দিয়ে একটি প্রকল্প অনুমোদন করা হয়েছে। কাজ চলমান রয়েছে, শেষ হলে সেখানকার অনেক উন্নতি হবে।